

**Inissiaatileqatigiiffimmik pilersitsinissaq pillugu Inatsisartut peqqussutaata  
allangortinneqarneranik Inatsisartut peqqussutissaattut siunnersuut  
pillugu**

**Inatsisartut Attaveqaqatigiinnermut Ineqarnermullu Ataatsimiititaliaata**

**ISUMALIUTISSIISSUTAA**

**siunnersuutip aappassaaneernejarnerani saqqummiunneqartoq**

Inatsisartut Attaveqaqatigiinnermut Ineqarnermullu Ataatsimiititaliaat  
suliarinninnermini ukuninnga inuttaqarpoq:

Inatsisartuni ilaasortaq Isak Davidsen, Atassut, siulittaasoq  
Inatsisartuni ilaasortaq Kalistat Lund, Siumut, siulittaasup tullia  
Inatsisartuni ilaasortaq Jens Napaattooq, Siumut  
Inatsisartuni ilaasortaq Johan Lund Olsen, Inuit Ataqtigiit  
Inatsisartuni ilaasortaq Palle Christiansen, Demokraatit

Inatsisartut Attaveqaqatigiinnermut Ineqarnermullu Ataatsimiititaliaata  
Inissiaatileqatigiiffimmik pilersitsinissaq pillugu Inatsisartut peqqussutaata  
allangortinneqarneranik Inatsisartut peqqussutissaattut  
Naalackersuisutsiunnersuutaat, nassuiaatitai ilanngullugit, misissuataarpaa.

**Apeqqutit**

Ataatsimiititaliaq siunnersuutip oqaluuserineqarneranut atugassanik  
Attaveqaqatigiinnermut, A-vatangiisinut Ineqarnermullu Naalackersuisoq  
apeqqutininut arlalinnut akissuteqaqqullugu qinnui-gaa. Ataatsimiititaliap apeqqutaasa  
Naalackersuisunilu ilaasortap akissutaasa nuutinneri isumaliutissiissummut  
matumunnga ilanngunneqarput.

Inissiani amerlasuuni ineqarnermut akiliutip qaffanneqarnissaa A/S Inissiatileqatigiiffiup INI-p 2002-p naajartornerani kissaatigisimavaa. Ineqarnermulli akiliutip taamatut qaffanneqarnissaanik ilimasaarineq inatsimmi piunasaqatigiineqartumik naammassinninngimmat ineqarnermut akiliutip qaffanneqarnissaa ulloq 1. marts 2003-imut kinguartinneqartariaqarsimavoq. Tassunga atatillugu Inatsisartut Attaveqatigiinnermut Ineqarnermulli Ataatsimiititaliaata ajuusaarutigalugu paasivaa A/S Inissiatileqatigiiffiup INI'p ukiup qaammataanni siullerni marlunni isertitaqarnerussutissaminut piviusunngortinneqanngitsunut taartigititassanngorlugit ineqarnermut akiliutit qaffaatissai naatsorsorsimagai. Ineqarnermut akiliutit taamatut kingumoortumik taamatut qaffanneqarnissaat ataatsimiititaliap pissusissamisuunngitsutut isigaa, siunissamilu taamatut pisoqaqqinnginnissaa matumuuna kaammattuutigissallugu.

### **Siunnersuutip imarisai**

Ataatsimiititaliap isumaqatigiittup siunnersuut isumaqatigaa. Inatsisartut Attaveqatigiinnermut Ineqarnermulli Ataatsimiititaliaata A/S Inissiatileqatigiiffup INI'p suliassaasa erseqqissarneqarnissaat pitsaasutut isigaa. Taamatuttaaq INI-p suliassaminik pingaarnernik suliaqarnermini iluanaarniarnermik tunngaveqanngitsumik sulinissaa ataatsimiititaliap pissusissamisoortut isigaa, tamatumami ilanngullugu qulakkiissammagu inissiatileqatigiiffiup aningaasaliisunut iluaqutissaq pinnagu sullissanut iluaqutaasumik sulinissaa.

Taama oqaaseqarluni Inatsisartut Attaveqatigiinnermut Ineqarnermulli Ataatsimiititaliaata Inissiatileqatigiiffimmik pilersitsinissaq pillugu Inatsisartut peqqussutaata allanngortinneqarneranik Inatsisartut peqqussutissaattut siunnersuut aappasaanigassanngortippaa.

Isak Davidsen  
Siulittaasoq

Kalistat Lund  
Siulittaasup tullia

Jens Napaattoq

Johan Lund Olsen

Palle Christiansen

---

**ILANNGUSSAQ**

*1. Ataatsimiititaliap suliassarifat allannortinneri pineqarnersut (qulequttat ataani allassimasut malillugit) imaluunniit INI-p sunik suliaqarsinnaaneramik erseqqissaassutaannaanersoq (peqqussutissatut siunnersuutip allaffissornikkut kingunerisassaasa nassuiaataat malillugu) nassuiaateqarfigiterusuppa.*

Nalunaarutigineqarsinnaavoq suliassarifat allannuuteqartinneqartut, tassa inissiatileqatigiiffiup pingaarnertut sularissammagit Namminersornerullutik Oqartussat kommunillu inissiaataasa attartortitakkat ingerlanneqarnerat aqutsivigineqarnerallu. Tamanna immi suliassarisanik allannuineruvoq, aammali allaffissornikkut kingunerisasaanut tunngatillugu taamaallaat erseqqissarneqarpoq suliassanik sunik Inissiatileqatigiiffik suliaqassanersoq. Taamaattumik suliassarifat allannuuteqartinneqarnerisigut allaffissornek annertusineqaraniluunniit annikillilivigineqanngilaq allaffissornikkulli kingunerisasaanut tunngatillugu suliassat taamaallaat erseqqissarneqarlutik.

*2. Ammattaq Naalakkersuisuni Ilaasortap A/S Inissiatileqatigiiffiup INI'p 1. marts 2003-mi inissiat akiisa qaffannerannut atatillugu akiliisitsiniarnermini pissuseriligai qanoq isumaqarfigineraa ataatsimiititaliap paaserusuppa. Uani ukiumut ilivitsumut ineqarnermut akiliummik qaffaatissap kingusinaartumik nalunaaruteqarneq pissutigalugu, qaammatinut qulinut agguarneqarsimanera eqqarsaatigineqarpoq.*

Soorunami pitsaavallaanngilaq 2003-p qaammataani siullerni marlunni attartortut 2003-p qaammataanit kingullernit qulinit ineqarnermut akiliutinik appasinnerusunik akiliisassappata. Tamannali pisuni tamani atuutinngilaq. Ineqarnermut akiliutit akissaajaatinit assigiinngitsunit, taakkunani arlallit 2002-miit allannuuteqarsimanatik, katitigaapput. Matumanili pissutsit aningaasanut tunngatillugu annikitsuinnarmik sunniuteqartussat pineqarput.

2002-mi ineqarnermut akiliutit qaammammut 2.500 kr.-iuppata, ukiumut 30.000 kr.-inut naaper-tuuttut.

- 2003-mut missingersuusiat takutippaat qaffariaat 2,39%-iusoq (taanna Nuuk eqqarsaatigalugu agguaqatigiissitsissutaavoq). Taassuma kingunerisaanik ukiumoortumik ineqarnermut akiliutit 30.717 kr.-iulerput, taakku qaammammut 2.560 kr.-inut naapertuupput.
- 2003-p qaammataani siullerni marlunni taamaallaat 2.500 kr.-it qaammammut akilerneqartassapput. Qaammatini kingullerni qulini qaammammut 2.572 kr.-it akilerneqartassapput.
- Taamaalilluni qaammammut nikingassut 12 kr.-iuvoq, tassa maanna akilerneqartarmata 2.572 kr.-it 2.560 kr.-it naatsorsuutigineqaraluartut.

Ineqarnermut akiliutit assersuutigalugu qaammammut 5.000 kr.-iusimappata qaffariaatip 10%-ip kingunerissavaa qaammammut nikingassutaassamat 100 kr., qaammatini aqqaneqmarlunni ineqarnermut akiliutit qaammammut 5.500 kr.-iussapput, qaffaanerulli kingusinaarneratigut qaammati-ni marlunni siullerni ineqarnermut akiliut 5.000 kr.-iussaaq qaammatini 10-ni kingullerni 5.600 kr.-iussalluni.